

■ CONVIVENZA

L'onn senza festa da Nadal

DA FADRINA HOFMANN*

Tut deprimids èn mes uffants vegnids a chassa dacurt cun in fegl d'infurmaziun da la scola. Sin quel era numnadamain remartgada la sequenta frasa: «I'ns displascha da stuvair comunicar cha'l Bös-chin 2020 nu po avair lö quist on.» La tradiziun vegnia stritgada or dal chalender d'occurrentzas. Pia nagina festa da Nadal da scola en baselgia. Nagin pignol da Nadal gigantesc cun plunas cullas traglischantas e vairas chandailas. Nagin'agitaziun il suentermezdi durant preparar la gronda saira. Nagina partenza festiva, cura ch'ils zains cloman la raspada en baselgia. Nagin chant cuminaivel. Il 2020 na vegn betg mo ad esser l'onn da corona, el vegn er ad esser l'onn senza «Bös-chin».

Sche jau pens a mes temp da scola, era gist la tradiziun da festivar Nadal da scola en baselgia il highlight da l'onn. Jau ma regord anc da quel sentiment da commoziun cura che tuts – uffants e creschids – chantavan cuminaivlamain per finir il cult divin da Nadal «O bainvgnü Nadal». I regiva in spiert da cuminanza, jau ma sentiva protegida e plain aspectativas.

Jau na vuless betg daven-
tar patetica, ma in Nadal senza «Bös-chin» n'è betg



mo per mes uffants ina trista novitad. Pensond raziunalmain hai jau chapientscha per la decisiun da la scola. I va per la segirtad. Memia ristgà fissi dad organisar in'occurrentza, nua che tut ils bancs da la baselgia gronda da Scuol fissan emplenids – quasi l'unica giada en tut l'onn, dal rest. E tuttina sun jau persvadi-
da che gist en temps da crisa duvrass ins quel spiert da cuminanza che sa sviluppa en quest mument spezial da Nadal da scola en baselgia. I duvrass in lieu, nua ch'ins senta privadientscha ed appartegnientscha.

Gist per uffants èn rituals impurtants. Rituals e tradiziuns dattan structura, segirtad ed orientaziun – e rinforzan il sentiment da betg esser sulet sin quest mund. Studis psicologics mussan schizunt che rituals reducechan temas. Rituals festivs sco Pasca u Nadal èn colliads cun sentiments positivs e stgaffeschans regurdientschas. Jau ma regord

per exempel fitg bain da quel mument, cura che tut mia classa chaminava lung il corridor da la baselgia, speravia a tut ils confamigliars fin en il chor da la baselgia – cun battacor ed eglis che tshertgan, nua che bab e mamma sesan.

Cler, ins pudess dir: ma bain, quest onn da corona è in'excepziun, ins sto simplamain acceptar la situaziun extraordinaria, l'onn che vegn datti segir puspè il «Bös-chin». Segir, per nus creschids n'è quai betg uschè tragic, ma en la biografia d'in uffant vegn l'onn 2020 oramai ad esser l'onn senza festa da Nadal. Quella festa cun lur conscolars e lur confamigliars en il rom festiv en baselgia na turna betg pli. In pitschen confiart datti tuttina: l'uffizi da sanadad n'ha betg scumandà festas da Nadal en in rom famigliar. E: la scola da Scuol ponderescha anc in'alternativa per las classas primaras. Cun in zic premura pudess l'onn 2020 daven-
tar per mes uffants insatge sco «l'onn dal Nadal en il guaud», inclusiv chant e sentiment da cuminanza. Quai confortass perfin era lur mamma ...

*Fadrina Hofmann è redactura da la «Südostschweiz» e viva cun sia famiglia a Scuol.

La «Convivenza» cumpara per il glistedi en la «Südostschweiz» ed en La Quotidiana.